

# «D'abolir il tschains d'aua n'è nagin tema»

Uniun grischuna d'artisanadi e mastergn

DA GION NUTEGN STGIER / ANR

■ **Dapi ier ha la pli gronda associaziun professiunala dal Grischun in nov president. Quai è Herbert Stieger, l'inschigner electricist da 54 onns. El veglia cunzunt s'engaschar per diminuir la burocrasia e per introducir pli svelta la digitalisaziun.** Da las numerusas uniuns e federaziuns che nus avain èn noss chantun è segir l'Uniun grischuna d'artisanadi e mastergn ina da las pli impurtantas. Quella uniun cun passa 6000 commembers che derivan da 63 secziuns ed associaziuns professiunalas è il motor da l'economia grischuna. A Cuira ha gi lieu la radunanza da delegads cun 130 preschents e bunamain 80 giasts da la politica, da l'economia e dal turissem. Per *Urs Schädler*, el ch'è dapi 12 onns president da l'uniun, è la radunanza da delegads dad ier stada la davosa sco parura.

## Dapli trasparenza

Schädler ha ditg en ses davos rapport annual sco president che l'economia grischuna saja anc adina sut pressiu er sche, en intginas regiuns, hajan la mastergnanza ed il turissem meglras vistas che er schon. Ultra da quai hajan blers manaschis lavurà il davos onn per in pau pli bain che l'onn precedent. Per l'avegnir sajan investiziuns necessarias, pertge nua ch'i vegnia investà saja er pussaivel da surdar lavurs. Tar la surdada da las lavurs saja da sa tegnair a las reglas da la concurrenza, gist perquai sajan avant maun las prescripziuns legalas. Sche quai na saja betg il cas, lura saja da pretender dapli



Ilis purtaders dal Premi d'innovaziun 2018: Giancarlo Pallioppi, Primo Berera e Claudia Züllig (da san.).

MAD

transparenza e cunzunt immediatamain instradar in scleriment.

## Adina damain solidaritad

La realitad saja er en l'economia che las iniziativa vegnian acceptadas dals chantuns cun ina gronda populaziun, uschia che las regiuns periferas sco il Grischun hajan da patir. En l'avegnir saja da reducir la suveranità e solidaritad dals chantuns, ha ditg Schädler. Quitads fa ad el er la nova lescha da la planisaziun dal territori. Er la pressiu sin ils tschains d'aua saja avant maun ed en quella chausa sa-

ja la politica dumandada, il chantun ed er il mastergn. Ilis chantuns muntagnards hajan da restar dirs quai che pertutga las tractativas cun la confederaziun ed er cun las ovras idraulicas. Schädler ha ditg: «En nagin cas vegn l'Uniun grischuna d'artisanadi e mastergn ad acceptar la proposta da l'uniun tetgala svizra d'abolir il tschains d'aua fin ch'i na vegnia betg chattà ina cumpensaziun gista per l'obligaziun e l'impurtanza da la materia prima aua.»

En il futur hajan nus tuts da sa fetschentar pli fitg cun l'eliminaziun da las

vals periferas per pudair sa concentrar pli ferm sin centers regionalis. Quella realitad fetschia propi er ad el mal, ha ditg Schädler. Savens haja er l'economia da curreger intginas finamiras, esser pli flexibla e gist quai saja ina fermezza dals manaschis mesauns, ha menziunà il president partent. I dovra simplamain in motor per l'economia e sche quai na saja betg la politica, alura haja la mastergnanza da surpigliar quella direenziun. Per ses pled final ha Schädler retschet bler applaus ed è vegnì nominà president d'onur.

## Trais finamiras impurtantas

Il nov president *Herbert Stieger* ha ditg ch'el haja per l'entschatta da ses uffizi trais finamiras impurtantas. El vegnia a s'engaschar en tuttas modas e manieras per che noss chantun organischeschia ils Campiunadis mundials da professiun. Ultra da quai dovra mintga manaschi damain burocrasia, pli paucas ordinaziuns e regulaziuns. Cun el avair da far professiunaler cun la digitalisaziun vulesse el promover pli fitg quella er èn noss chantun.

## Premi per il «Zauberwald»

L'istorgia da success dal «Guaud magic» a Lai cuntinuescha. Dal success da quella occurrenza turistica ha er l'Uniun grischuna d'artisanadi e mastergn conschientscha. Er l'impurtanza economica, turistica e culturala da quel event, il mais da december a «l'Eichhörliwald» a Lai, è enconuschenta a las persunas che statan a la testa da l'uniun. *Baseli Werth*, il vicepresidente da l'Associaziun chantunala d'artisanadi e mastergn, ha tegnì la laudatio per il purtaders dal Premi d'innovaziun 2018. El ha ditg che gist er il turissem dovria novas ideas e glieud innovativa. I dovra er blera perseveranza dals iniziants da mintga project. Tar in da quels projects tutga il «Zauberwald» a Lai. Davos in tal project sajan er persunas che s'engaschian fitg, hajan visiuns e realiseschian er quellas. Tut quai saja d'attribuir als iniziants dal «Guaud magic» *Giancarlo Pallioppi, Primo Berera e Claudia Züllig*. Els cun il «Zauberwald» meritan il Premi d'innovaziun 2018, dotà cun 3000 francs.